

宸垣識略

宸垣識畧卷十

仁和吳長元太初氏輯

苑囿

南苑在都城南二十里永定門外元爲飛放泊明永樂時增廣其地周垣百二十里我朝因之設海戶一千六百人各給地二十四畝春蒐冬狩以時講武

長元按高士奇云明永樂間繅以周垣百六十里育養禽獸又設二十四園以供花果內有三水故以海名

南苑繚垣一萬九千二百八十丈爲九門正南曰南紅門東南曰迴城門西南曰黃村門正北曰大紅門稍東曰小紅門正東曰東紅門東北曰雙橋門正西曰西紅門西北曰鎮國寺門內海子五

考按朱彝尊所引明一統志稱南苑繚垣一萬八千六百六十丈中有海子三者實未詳考

南苑總尉一人正四品防禦八人正五品屬奉宸苑

大紅門

亦稱北紅門

內更衣殿南向門殿二層舊有南苑官

署房三層共十八間

舊衙門行宮在小紅門西南建自前明 本朝順治中
重葺門殿四層皆有

御書聯額後殿東爲蔭榆書屋西爲西書房南爲書室
平臺樓之東另一官門內殿二層後爲佛室

晾鷹臺在南海子內高六丈徑十九丈有奇周徑百二
十七丈本元仁虞院凡

大閱例于晾鷹臺舉行

張英南苑講武恭紀時平講武近岐陽甲冑蒐春
出建章洛水旌旗周甫草西京詞賦漢長楊御園

雲氣成龍虎天廐星精本
躡霜畫戟雕弓森羽衛
射生羣與奉君王

金德瑛南苑大閱恭紀組練飛馳捷羽翰城南草
淨列營寬六師盡識尊尊誼萬乘親升將將壇鼓
角濤喧驚野外旌旗雲合映林端正當雪積霜凝
候挾纒恩深士不寒

齊召南南苑大閱恭紀禡牙金甲照南山軍令
重瞳曉自頒三陣指揮天地合百年清晏虎貔閒
笳風羽箭千鵬落苑雪桃花萬馬還共說至尊

雄略盛御園親取大弓彎

雙柳樹在海子居中之地舊有古柳二株先後凋枯隨時補植並蒙題咏有水一道爲飲鹿池崑崙石在池之西四面勒

御製南苑雙柳樹暨春雲海戶謠雜言東偏石幢勒甲子年題句

長元按南苑西苑暢春圓明等處宮室亭臺歷年御製題咏甚多茲不能備列惟已勒石者則謹舉其目焉

南行宮在南紅門內里許門對苑牆宮門二重前後殿
二層後殿額曰暢遠襟

新衙門在鎮國寺門內約五里許建自前明門殿三層
宮門前鐵獅子二上鑄延祐元年十月製元時物也
後殿東爲裕性軒古秀亭西爲澹思書屋陶春室皆
御書聯額

團河行宮在黃村門內六里許宮門內前殿額曰璇源
堂後殿額曰涵道齋別室爲鑒止書屋皆

御書東所大宮門內有東西配殿九間房河中殿宇

平臺石板房石亭水柱房六方亭河亭圓亭 六方
亭在北山之上額曰鏡虹河亭接苑牆之南其下卽
團泊之水流向苑外團河迤邐而入鳳河者也圓亭
額曰雲隨

西直門外高粱橋之北宮門內爲 倚虹堂堂西二里
許爲

樂善園

舊爲康熙
王國亭

門北向內跨小溪南爲穿堂東向曰

意外味轉石徑而南爲於此賞心內爲含清齋東爲
瀟碧北爲約花闌南有軒爲雲隨波動 含清齋對

河敞宇爲池月岩雲中穿堂爲翠微深處內爲蘊真
堂南爲氣清心遠別院有室曰鸞舉軒垣外是爲園
之南門

於此賞心之西南爲又一村左有亭爲攬衆翠 意
外味之西穿堂爲得佳賞西爲蘭秘室爲環青渟碧
蘭秘室之北有亭爲賞仁勝地

園門內有樓爲冲情峻賞東北爲紅半樓其旁峙岩
上者爲踞秀亭 冲情峻賞之西南有室爲畫所不
到東爲揖長虹再東爲蔭林宅岫內爲古歡精舍

園門以西臨河敞宇爲自然妙有西室爲風湍幽響
再西有軒爲詩畫間爲玉潭清謚亭爲箇中趣亭北
敞宇爲坐觀衆妙西出河口折而南有室爲致灑然
接宇爲光碧涵暉東曰遠青無際爲雲林畫意再東
有軒爲心乎湛然折而南爲綠雲間

樂善園西八里許路北設關門長衢列肆曰萬壽街
從此北達 暢春園

暢春園在南海淀大河莊之北繚垣一千六十丈有奇
本前明戚畹武清侯李偉別墅

聖祖因故址改建爰錫嘉名

皇上祇奉

慈闈于此因在 圓明園之南亦名前園

宮門內有小河環繞中爲

九經三事殿殿後二宮門中爲 春暉堂後爲垂花門
內殿曰壽萱春永後倒座殿爲嘉蔭兩角門中爲積
芳亭正宇爲雲涯館後度橋循山而北有河池南北
立坊曰玉澗金流門內爲瑞景軒爲林香山翠後爲
延爽樓樓後河上爲鳶飛魚躍亭稍南爲觀蓮所左

爲式古齋齋後爲綺榭

考按園內築東西二隄長各數百步東堤曰丁香
西堤曰蘭芝西堤外別築一堤曰桃花東西兩堤
之外大小河數道環流苑內出西北門五空闌達
垣外東經水磨村趨清河西流則由馬廐注入
圓明園自宮門至此爲暢春園中路

王鴻緒 賜遊暢春園恭紀西嶺千重水流成裂
帛湖分支歸 御苑隨景結蓬壺玉凍凌波迥瑤
臺入漢孤上林曾有賦于此見真圖 湖映千林

綠山圍一苑青花間開鳳閣樹杪出龍亭香氣無
邊散鶯聲不斷聽更看幽絕處魚網掛烟汀

蔡升元 賜遊暢春園恭紀高齋凌碧漢甲觀俯
清漪靜檻無遺照澄淵豈易窺燕閒仍典籍苑囿
亦茅茨儉德尤堪紀規模百世師 若比武陵源
尤堪避俗喧桑麻新闢野桃李儼成村列肆符天
市平疇接禁園吾 君遊息處念念在黎元

胡會恩 暢春園侍宴恭紀黃綸夙戒下瑤天遴
集儒臣禁苑前曉月聯鑪三事後薰風鳴珮五雲

邊畫長綏通花間漏官靜惟聞柳外蟬清切尙方
調玉膳年來三度渥瓊筵 畫鵲蘭旌曲岸隈乘
查真向御溝來舟移碧島千林靜身在冰壺一鏡
開不盡清輝含草樹無邊佳氣拂樓臺雲牕四面
芙蓉發高譙香浮白玉杯

張廷瓚 暢春園引見恭紀西山蒼翠護 宸居
簪珮趨承到玉除地接平疇觀稼穡檕牕迎深綠擁
圖書柳絲細織春烟外鶯囀初調畫漏餘身入上
林深閤地揮毫獻賦愧相如

雲涯館東南過板橋爲劔山上爲蒼然亭下爲清遠亭由山東轉爲龍王廟過清遠亭沿堤而南河上有門西向曰廣渠門內爲澹寧居前爲

聖祖御門聽政選館引見之所後爲

皇上舊時讀書處

大東門北山循河西上爲淵鑒齋後臨河爲雲容水態左廊後爲佩文齋齋後西爲葆光東爲蘭藻齋淵鑒齋之前水中殿宇爲藏暉閣閣後爲清籟亭佩文齋之東爲養愚堂爲藏拙齋 淵鑒齋東過小

山口北有府君廟

府君像如星君
旁殿奉呂祖像

查慎行淵鑒齋乘舟至瑞景軒蕊珠院露華樓徧
觀各種牡丹恭紀宣喚欣承異數加高從雲漢泛
仙槎行陪閨苑神仙侶看徧春風穩重花濃淡何
心隨造化丹青難貌是韶華旃檀別殿分明到只
作華胥好夢誇 艷極真宜過雨看枝頭肅肅尙
朝寒盤盂向背開瓊扇瓔珞高低現寶鬢白日光
中雲五色明波濯處錦千端天邊頃刻成新瑞點
出靈砂九轉丹 萬卉千葩未覺稠掃宮老監記

牙籌薌林不斷通三島
花海無邊際十洲佳氣茵
葢蒸作霧餘霞縹緲結成樓
垂珠一本尤奇絕徑
尺重臺兩並頭
瑤堦釵砌望迴環
映徹層層著
色山
御譜新標題品外
花名九十餘種皆御定
佳名微別
淺深間心如草木春
知閨天並
君王霽在顏
一片爐烟成百和
袖中攜得國香還

蘭藻齋東北山後西宇爲疏峯循岸而西
臨湖爲太樸軒
東石徑接小東門
溪北爲清溪書屋
導和堂西
穿堂門外爲昭回館
清溪書屋西爲藻思樓
竹軒

清溪書屋雍正間改導和堂東穿堂門卽恩佑寺
佛殿後也

恩佑寺建于苑之東垣內山門東向外臨通衢門內
跨石橋有正殿配殿寺右爲恩慕寺爲

孝聖祝釐之所殿宇規制與恩佑同

考按自劔山至此爲暢春園東路

春暉堂之西出如意門過小橋爲玩芳齋山後爲韻
松軒

勵杜訥韻松軒卽事詩一過紅橋便有亭勝于蓬

島隔滄溟當堦十畝翻紅藥入望千峰擁翠屏
文鱗縱壑任逍遙鶴唳清音徹絳霄俛仰濠梁聊
自適荷風微度遠香飄

二宮門出西穿堂門爲買賣街南垣外爲船塢門內
別宇曰西墅接無逸齋東門

由船塢西行數武跨河上爲韻玉廊西爲松篁深處
自右廊入爲無逸齋門內正殿爲問安憩息之所西
廊內爲對清陰廊西爲蕙畹芝原

查慎行無逸齋看新竹恭紀地闢琅玕塢天通箭

栢門烟霄連別苑雷雨過前軒簌簌風開鐙洄洄
水注根移栽初尙淺培養久能繁惜笋寧充饌抽
稍盡出藩幾年成翠幕一徑轉蒼垠潤滴莓苔砌
高扶薜荔垣涼陰清有氣新粉淨無痕直節人皆
見虛心道亦存律堪調鳳吹名豈愧龍孫好報平
安信休孤長養恩親從天上看丕美白沙村

無逸齋北郭門外南爲菜園數十畝北則稻田數頃
齋後稍東有關帝廟

聖祖御書額曰忠義過板橋方亭爲蓮花岩對河爲松

栢園廟後爲娘娘殿殿臺方式建水中

考按松栢園河之東卽蘭芝堤西岸卽桃花堤

凝春堂在淵鑒齋之西東爲純約堂其右河廳爲迎
旭堂 純約堂東爲招涼精舍河廳之西爲轉灣橋
北圓門爲憩雲 迎旭堂折而北爲曉烟榭河岸以
西爲松栢室額曰翠岩山房左爲樂善堂別院有宇
爲天光雲影 松栢室後臨河爲紅葉亭白天光雲
影後廊登山東宇爲綠牕山北爲回芳墅紅葉亭東
爲秀野亭自回芳墅北轉山口水榭閣爲葉珠院

額曰憑虛暢襟 藥珠院北埠上層臺爲觀瀾榭東
河廳爲坐烟槎臺榭後爲蔚秀涵清爲流文亭 藥
珠院西過紅橋爲集鳳軒軒前連房九楹中爲穿堂
長元按乾隆戊辰九月大西門樓集侍衛校射
上親發二十矢中十九矢有集鳳軒紀事詩勒石

齊召南大西門觀 御射恭紀曠曠初日照西山
百尺樓開紫翠間 御苑經寒欣草淺秋風講武
值農閒虎熊的畫君臣鵠鴻鷺墀分左右班何幸
此時叨侍從大弓親觀 至尊轡 駟虞聲節九

相當五色雲環 御葢黃但聽舉旌權破的真看

隨手會穿揚百年禮樂乾坤泰萬國車書日月光

神武祇應崇不殺仰占弧矢直天狼 侍臣如

堵並呼嵩巧力分明不可同容節中和 天子射

弛張高下 聖人弓曾聞作賦誇雙兔更說題詞

數六熊何似我 皇能百中閒臨矍相教羣工

射罷還揮七寶鞭驂騑蹀躞過橋前千峯金碧明

流水萬樹丹黃寫遠天豈爲從禽矜羽獵祇緣祭

獸應秋田由來武事關 文德好憶岐陽刻石年

穿堂門北正殿稍左爲月崖右爲錦波亭度河橋西
爲俯鏡清流 穿堂門西出循河而南爲大西門延
樓其外卽西花園馬廐 集鳳軒後河橋西爲閘口
門閘口北爲小西門北一帶延樓自西至東北角西
樓爲天馥齋自東轉角樓再至東面中樓爲雅玩齋
天馥齋東爲紫雲堂堂之西過穿堂北爲西北門卽
苑牆也

考按自玩芳齋至此爲暢春園西路

西花園在 暢春園西前臨河正殿爲

卷之四
討源書屋後殿宇爲觀德處

沈德潛敬和 御製討源書屋元韻玉泉山色滿

林園澗水依然夾道奔花亞雕闌紅破萼苔侵鉤

砌綠添痕龍飛鳳舞欽

皇祖

有聖祖御書

春露秋霜

感 聖孫一月萬川澄印處周情孔思見真源

園西南門內爲承露軒後廈爲就松室東有龍王廟

西北有門卽西花園之大北門也內正宇五楹後室

舊稱爲東書房其右爲

永寧寺

詳郊

後爲船塢寺

西爲虎城爲馬廐再西爲閱武樓

西花園之前有荷池沿池分四所爲 皇子所居曰
南所東所中所西所俱有正殿正室

圓明園在掛甲屯之北距 暢春園里許爲

世宗藩邸 賜園園名

聖祖御書

世宗有圓明園記

今上製圓明園後記俱勒石

園內爲門十八南曰大宮門曰左右門曰東西夾道
門曰東西如意門曰福園門曰西南門曰水闌門曰

藻園門東曰東樓門曰鐵門曰明春門曰隨牆門曰
藥珠官門西曰隨牆門西北曰北樓門爲闌三西南
爲一空進水閘東北爲五空出水閘爲一空出水閘
大官門前輦道東西皆有湖是爲前湖 二宮門爲
出入賢良門內爲

正大光明殿後爲 壽山殿東爲洞明堂正大光明東
爲

勤政親賢殿東爲飛雲軒靜鑑閣其北爲懷清芬又北
爲秀木佳蔭後爲生秋庭靜鑑閣東爲芳碧叢爲

保合太和正殿後爲富春樓東爲竹林清響殿後有
湖亦稱前湖正北爲圓明園殿後爲奉三無私
殿又後爲

九州清晏殿東爲天地一家春西爲樂安和又西爲清
暉閣閣前爲露香齋左爲茹古堂爲松雲樓右爲涵
德書屋

徐本甘霖普降 特召大學士內廷翰林圓明園
泛舟恭紀甘霖昨喜徧郊畿 詔許新晴覽翠微
萬井膏腴方被澤一園草木已含暉波隨權影初

生穀涼沁荷香暗襲衣幸奉良遊瞻 聖藻疇咨
念念切民依

彭啓豐甘霖普降 賜圓明園泛舟恭紀上林風
景畫圖工倒影樓臺萬象中秀簇方壺瞻眺遠恩
深太液泳游同涼颺拂處榆槐綠綺浪翻時菡萏
紅仰觀 宸章親灑翰作舟還重濟川功 宵旰
殷懷若雨暘 萬幾遊覽悅時康臣鄰一德觀元
化禁近承恩覲 帝光繞楫鳬鷺淡容與忘機鷗
鷺共游翔欲知圖繪幽風意早盼黃雲稻隴香

介福甘霖普降 賜圓明園泛舟恭紀篆烟刻漏
日長時雨霽涼生太液池躍浪文魚依檻近凌風
沙鳥度舟遲垂楊影裏瞻 天藻流水聲中進小
詩盛典幸逢 幾暇候銜恩均托上林枝

鏤月開雲在富春樓之後卽紀 恩堂北爲御蘭芬鏤
月開雲後有池一區池西北爲

天然圖畫樓北爲朗吟閣又北爲竹邁樓東爲五福堂
迤北爲竹深荷靜東南爲靜知春事佳又東渡河爲
蘇堤春曉由五福堂渡河而北山阜旋繞內爲

碧桐書院殿宇三重西岩上爲雲岑亭書院之西爲
慈雲普護前殿南臨後湖其北樓宇上祀觀音下祀關
帝東爲 圓明園昭福龍王殿西臨湖有樓爲

上下天光後爲平安院西折而南度橋爲

杏花春館西北爲春雨軒西爲杏花村南爲礪壑餘清
春雨軒後東爲鏡水齋西爲抑齋又西爲翠微堂杏
花春館之西度碧瀾橋爲

坦坦蕩蕩前爲素心堂後爲光風霽月堂東北爲知魚
亭又東北爲萃景齋西北爲雙鶴齋其南爲

茹古涵今南向後方殿爲韶景軒前爲茂育齋西爲竹香齋又北爲靜通齋茹古涵今之南爲

長春仙館門殿三重後爲綠蔭軒西廊後爲麗景軒長春仙館之西爲含碧堂後爲林虛桂靜左爲古香齋東有閣爲抑齋林虛桂靜東稍南爲墨池雲爲隨安室長春仙館迤西爲藻園內爲曠然堂爲貯清書屋曠然堂東池上爲夕佳書屋北爲鏡瀾榭東南爲凝眺樓懷新館西北爲湛碧軒西南爲湛清華

萬方安和在杏花春館西北建宇池中形如卍字度橋

稍北石洞之南爲

武陵春色池北軒爲壺中日月長東爲天然佳妙其南
厦爲洞天日月多佳景武陵春色之西爲全碧堂東
南爲小隱樓遲堂後由山口入東爲清秀亭西爲清
會亭北爲桃花塢塢西爲清水濯纓室又西稍北爲
桃源深處塢東爲綰春軒軒東北爲品詩堂

山高水長樓在萬方安和西南西向後擁連岡前帶河
流中央地勢平行凡數頃北度橋梵剎一區爲

月地雲居前殿方式四面後有樓東爲法源樓又東爲

靜室西度橋折而北爲劉猛將軍廟循山徑入爲
鴻慈永祐卽安祐宮前琉璃坊左右華表南爲月河橋
又東南爲致孚殿安祐門前有白玉橋內爲安祐宮
殿敬奉

聖祖 世宗神御西北爲紫碧山房前爲橫雲堂山房
東岩洞中爲石帆室東南爲豐樂軒北爲霽華樓迤
東爲景暉樓橫雲堂西池上爲澄素樓爲引溪亭鴻
慈永祐東垣外徑連岡三重度橋而東則

藁芳書院內爲抒藻軒涵遠齋齋前西垣內爲翠照樓

東垣內爲倬雲樓又東爲眉月軒倬雲樓南爲隨安室又東敞宇爲問津逾溪橋有石坊爲斷橋殘雪

日天琳宇在彙芳書院之南西前樓下之正宇也其制有中前樓中後樓西前樓西後樓各有穿堂中前樓南有天橋與樓相屬天橋東爲燈亭西前樓南爲東轉角樓西轉角樓中前樓之東垣內八方亭爲楞嚴壇又東別院爲瑞應宮前爲仁應殿中爲感和殿後爲晏安殿東南稻田彌望河水周環中有田字式殿凡四門東北面皆有樓北樓爲

澹泊寧靜東爲曙光樓殿東山門外爲扶翠樓西門外
別院內爲多稼軒東臨稻畦爲觀稼軒爲怡情悅目
爲稻香亭又東北爲溪山不盡爲蘭溪隱王多稼軒
西池南爲水精域西爲靜香書屋爲招鶴磴池後東
北爲寸碧西北爲引勝正北爲亙妙樓河西爲
映水蘭香東南爲釣魚磯北爲印月池池北爲知耕織
爲濯鱗沼西南爲貴織山房以祀蠶神東北爲
水木明瑟稍西爲文源閣上下各六楹閣前有巨石名
玲峯西爲柳浪聞鶯西北環池帶河爲

濂溪樂處後爲雲香清勝東垣爲菱荷深處折而東北
爲香雪廊其東樓爲雲霞舒卷樓北亭爲臨泉南爲
藁芳總春之廟殿額爲蕃育羣芳東北樓爲香遠益
清西爲樂天和爲味真書屋又西爲池水共心月同
明廟東沿山徑出爲普濟橋迤北對稻塍爲

多稼如雲前爲菱荷香東稍南爲湛綠室東北爲

魚躍鳶飛東爲暢觀軒西南爲鋪翠環流樓南有室爲
傳妙又南出山口爲多子亭魚躍鳶飛之東禾疇彌
望河南北岸彷彿農居村市者爲

北遠山村北岸石垣西偏爲蘭野後爲繪雨精舍其西
南爲水村圖又西有樓前爲皆春閣後爲稻涼樓又
西爲涉趣樓右爲湛虛書屋西南有室臨河西向爲
西峯秀色河西峯巒峻峙爲小匡廬後有龍王廟東爲
含韻齋爲一堂和氣東南爲自得軒後垣東爲嵐鏡
舫西爲花港觀魚西峯秀色迤東東西船塢各二所
北岸爲安瀾園正宇曰

四宜書屋東南爲荏經館又南爲采芳洲後爲飛睇亭
東北爲綠帷舫四宜書屋西南爲無邊風月之閣爲

涵秋堂爲烟月清真樓樓西稍南爲遠秀山房樓北
度曲橋爲染霞樓

長元按安瀾園倣海昌陳氏園名之葑經館采芳
洲飛睇亭綠帷舫無邊風月之閣涵秋堂烟月清
真樓遠秀山房染霞樓并正宇四宜書屋爲安瀾
園十景

方壺勝景在四宜書屋之東臨池樓宇也南建坊二座
其北樓宇爲噦鸞殿爲瓊華樓噦鸞殿東爲葉珠宮
南船塢有龍王廟西北爲三潭印月又西北度橋爲

天宇空明爲澄景堂堂東爲清曠樓西爲華照樓
澡身浴德在福海西南隅卽澄淵榭南爲含清暉北爲
涵妙識折而西向爲靜香館又西爲解愠書屋西南
爲曠然閣北度河橋爲望瀛洲其北爲深柳讀書堂
爲溪月松風

平湖秋月在福海西北隅正宇西爲流水音東北出山
口臨河爲花嶼蘭皋折而東南度橋爲兩峯插雲又
東南爲山水樂其北爲君子軒爲藏密樓

蓬島瑤臺在福海中央門南向正殿前東爲暢襟樓西

爲神仙三島東偏爲隨安室西偏爲日日平安報好
音由蓬島瑤臺東南度橋爲東島有亭曰瀛海仙山
西北度橋爲北島正宇

接秀山房在福海東隅後爲琴趣軒北爲澄練樓爲怡
然書屋爲尋雲樓稍東佛堂爲安隱幢南爲攬翠亭
接秀山房之南有敞宇依山臨河爲

別有洞天西爲納翠樓西南爲水木清華之閣稍北爲
時賞齋別有洞天迤西爲

夾鏡鳴琴南爲聚遠樓東爲廣育官前建坊座後爲凝

祥殿宮東爲南屏晚鍾又東度橋爲西山入畫爲山
容水態夾鏡鳴琴之西爲湖山在望爲佳山水爲洞
裏長春

涵虛朗鏡在福海東卽雷峯夕照正字其北爲惠如春
爲尋雲榭又北爲貽蘭庭爲會心不遠其南爲臨衆
芳爲雲錦墅爲菊秀松蕤爲萬景天全

廓然大公在福海西北隅平湖秋月之西正字前爲雙
鶴齋西北爲規月橋東北爲綺吟堂又北爲採芝徑
又北經岩洞而出爲峭蒨居北垣門外有樓爲天真

可佳峭蒨居西爲披雲徑又西爲啓秀亭西稍南爲
韻石淙西北平臺臨池爲芰荷深處垣外爲影山樓
雙鶴齋西爲環秀山房西北爲臨湖樓

長元按雙鶴齋規月橋綺吟堂採芝徑峭蒨居天
真可佳披雲徑啓秀亭韻石淙影山樓爲廓然大
公十景

坐石臨流在澹泊寧靜之東溪水周環軒宇東向其東
南當碧桐書院正東爲

麴院風荷西佛樓爲洛迦勝境麴院風荷之南跨池東

西橋九空枋楔二西爲金鰲東爲玉蟪金鰲西南爲
四圍佳境玉蟪東爲飲練長虹又東南度橋折而北
設城關爲寧和鎮其南爲東樓門麴院風荷之北爲
同樂園層樓南向向前爲清音閣東爲永日堂中有南
北長街街西爲抱璞草堂街北度雙橋爲舍衛城前
樹枋楔三城南面爲多寶閣內爲山門正殿爲壽國
壽民後爲仁慈殿又後爲普福官城北爲最勝閣
洞天深處在如意館西稍南前宇乃 諸皇子所居爲
四所東西二街南北一街前爲福園門四所之西爲

諸皇子肄業之所前爲前垂天殿中爲中天景物東爲斯文在茲後爲後天不老

長元按 圓明園

御製四十景各有小序并詩今自正大光明至洞天深處凡另行頂寫者卽四十景之目也

長春園本 圓明園東垣隙地舊名水磨村依長春仙館命名園內諸河之水東出七空閘灌溉稻田
宮門內正殿爲

澹懷堂後爲衆樂亭後河北敞宇爲雲容水態西稍南

爲長橋雲容水態西北官門內爲含經堂後爲淳化軒東西廡嵌

御定淳化閣帖石刻後爲蘊真齋額曰禮園書圃含經堂東爲霞翥樓額曰味腴書屋爲淵映齋堂西爲梵香樓爲涵光室澹懷堂以西濱河水石之間爲

禔園門西向內爲朗潤齋東爲湛景樓又東爲菱香泚

朗潤齋有石立于門內爲青蓮朶

卽宋德壽宮芙蓉石

齋東南

山池間爲標勝亭又東南爲別有天西北爲韻天琴南角門外別院爲委宛藏是爲八景有

御製詩勒標勝亭西壁又

御製重摹梅石碑置青蓮朶側詩

園後河北岸爲思永齋北爲山色湖光共一樓齋東
別院爲

小有天園引西湖汪氏園也 思永齋西南河外爲得
全閣南爲寶雲樓齋北水涯中有圓式樓宇三層爲
海岳開襟四旁枋楔各一海岳開襟東北爲諧奇趣
東爲法慧寺山門樓殿凡二層有

御書額東爲實相寺山門殿閣凡三層有

御書額 由寶相寺度城關而東迤南爲交翠軒爲熙
春洞北爲愛山樓爲澤瀾堂愛山樓東北爲平疇交
遠風爲轉湘帆平疇交遠風之東爲叢芳榭爲琴清
齋叢芳榭之東爲

獅子林八景曰獅子林虹橋假山納景堂清閨閣藤架
磴道占峯亭又續題八景曰清淑齋小香幢探真書
屋延景樓畫舫雲林石室橫碧軒水門 獅子林之
南爲玉玲瓏正宇爲正誼明道北爲林光澹碧東爲
鶴安齋西爲蹈和堂

鑑園之後有船塢由鑑園北山徑折而東爲東宮
門樓宇東向外爲護河有石橋

如園在鑑園西南內爲敦素堂北稍東爲冠霞閣爲明
漪樓由如園山徑西行卽澹懷堂之東垣門

清漪園在萬壽山麓圓明園西二里許臨昆明湖
宮門東向兩石梁下爲溪河左右罩門內爲

勤政殿有

御製座右銘萬壽山昆明湖記殿後北達怡春堂西
爲玉蘭堂北爲宜春館館西爲樂壽堂前有大石鐫

御題青芝岫三字東曰玉英西曰蓮秀

長元按青芝岫卽明米萬鍾所運大石置良鄉者
樂壽堂後折而西爲方池池北爲樂安和西爲長廊
達石丈亭西北爲養雲軒餐秀亭亭後石壁勒

御書燕臺大觀四字西爲無盡意軒稍北爲圓朗齋無
盡意軒之後爲慈福樓樓西爲大報恩延壽寺

詳郊

坳

羅漢堂後爲寶雲閣閣西爲邵窩爲雲松巢又西
爲澄暉閣東南有三層樓額曰山色湖光共一樓西
爲聽鵬館館西爲石丈亭爲石舫舫北有樓爲延清

賞西爲曠觀齋又西爲水周堂 自此以北建城關
關上有樓奉關聖循城北折而西爲園之西門

怡春堂後城關以北爲

惠山園內池數畝池東爲載時堂北爲墨妙軒內貯三
希堂續摹石刻墻壁間嵌墨妙軒法帖諸石園池之
西爲就雲樓稍南爲澹碧齋池南折而東爲水樂亭
爲知魚橋就雲樓之東爲尋詩徑徑側爲涵光洞迤
北爲霽清軒軒後有石峽其北卽園之東北門

長元按惠山園倣無錫秦氏寄暢園也載時堂墨

妙軒就雲樓澹碧齋水樂亭知魚橋尋詩徑涵光
洞爲園中八景

惠山園西爲雲繪軒東爲迎綠軒後爲隨安室又西
爲花承閣閣之左爲多寶琉璃塔下有碑勒

御製頌 西北度橋爲城關又西折而北爲園之北樓
門在萬歲山之北門外以南爲長橋 長橋南佛寺
三座曰須彌靈境曰善現寺曰雲會寺 雲會寺北
爲構虛軒爲繪芳堂西南爲清可軒西爲味閒齋齋
北爲綺望軒繪芳堂北隔河爲嘉陰軒

宮門前東西二堤廊如亭繡漪橋

詳見郊坰

界湖橋之北爲景明樓樓西南湖中爲藻鑑堂堂西
湖岸爲暢觀堂西北湖中圓城爲門四其上爲治鏡
閣閣北湖岸爲延賞齋

長元按延賞齋左右廊嵌耕織圖石刻河北立石
勒耕織圖三字

靜明園在玉泉山下康熙十九年建初名澄心三十一
年更今名康熙雍正間嘗閱武于此

宮門南向內正殿爲

廓然大公殿北臨後湖湖中爲

芙蓉晴照西爲虛受堂堂之西山畔有泉爲

玉泉趵突上爲龍王廟

考按玉泉從山根仰出噴薄如珠寶與趵突之義

允合詳見 御製記中

泉上碑二左刊天下第一泉五字右刊

御製玉泉山天下第一泉記龍王廟南循石徑入爲

竹鑪山房南爲開錦齋後爲觀音洞賞遇樓觀音洞南

爲真武廟爲呂祖洞旁爲雙關帝廟廟南爲

聖因綜繪西爲寫流軒後爲層明宇又西爲福地幽居
爲冠峯亭迤西梵宇爲華藏海又西爲

繡壁詩態西爲

溪田課耕

臨河皆水田

又西爲迸珠泉

繡壁詩態之北爲

水月庵東爲城關庵北爲聖緣寺寺北爲仁育宮奉
東岳天齊大生仁聖帝像又北爲

清涼禪窟後爲嘉蔭堂東爲霞起樓西爲犁雲亭仁育
宮前度石橋爲園之西宮門達香山蹕路也清涼禪
窟之北爲涵光齋西爲飛淙閣東爲練影堂稍南爲

掛瀑簷涵漪齋西夾墻門外爲妙喜寺門殿三層西爲靜宜園界

采香雲徑在清涼禪窟之北南有樓曰靜怡書屋稍北折而東爲招鶴庭南爲

峽雪琴音迤南山巔爲

玉峯塔影前爲香岩寺後爲妙高臺北峯上爲妙高寺有妙高塔又後爲該妙齋妙高峯西爲崇禔軒東爲含醇室爲詠素堂 含經堂在妙高寺東山麓其東北臨溪爲書畫舫含經堂南有樓曰

風篁清聽東爲如如室西爲近青閣又西稍南爲飛雪
岷西度橋而南有池池東爲延綠廳西爲漱遠綠爲
試墨泉又西爲

鏡影涵虛南爲分鑑曲爲寫琴廊爲觀音閣寫琴廊迤
南爲含暉堂爲清音齋齋前爲

裂帛湖光齋西山麓爲碧雲深處東爲心遠閣由心遠
閣折而北爲羅漢洞又上爲水月洞又西山麓爲古
華嚴寺寺後爲

雲外鐘聲東爲伏魔祠碧雲深處以南爲

翠雲嘉蔭後爲翠雲堂東爲甄心齋

翠雲嘉蔭卽華滋館門額翠雲

嘉蔭之東爲小南門稍南爲東宮門

靜明園南宮門西南爲影湖樓

小東門外長堤石橋

上建石枋二迤東爲界湖橋橋下水北注玉河又北

至青龍橋卽達清漪園之輦道也

長元按自廓然大公至翠雲嘉蔭爲靜明十六景

靜宜園在香山前爲城關內東西各建坊中架石橋下

爲月河度橋爲

宮門內爲

勤政殿南北配殿前爲月河殿後北爲致遠齋南向西

定埠諸署
爲韻琴齋聽雪軒東有樓爲正直和平殿後西爲橫
秀館東向南爲日夕佳亭北爲清寄軒橫秀館後建
坊內爲

麗矚樓後爲多雲亭麗矚樓後南爲

綠雲舫麗矚樓迤南爲

虛朗齋前爲石渠爲流觴曲水爲畫禪室後爲學古堂
東爲郁蘭堂西爲佇芳樓又後宇爲物外超然其外
東西南北四面各設官門

考按虛朗齋相傳卽永安村地學古堂前周嵌

御製靜宜園二十八景詩刻石

東宮門外石路二南達香山寺東建城關達于帶水
屏山門宇南向西爲對瀑北爲懷風樓其左爲琢情
之閣東南爲得一書屋西爲山陽一曲精廬帶水屏
山之西爲

瓊瑤岩其上爲綠雲深處瓊瑤岩東稍南爲

翠微亭亭東爲

青未了亭迤西岩際爲

馴鹿坡坡西有龍王廟下爲雙井其上爲

蟾蜍峯

考按蟾蜍峯又謂之蝦蟆石雙井水東北注松塢
雲莊內入知樂濠由清音亭過帶水屏山繞出園
門外是爲南源之水

蟾蜍峯稍東爲松塢雲莊又東爲憑襟致爽後爲
棲雲樓香山寺前石橋下方池爲

知樂濠

香山寺在瓔珞岩之西前建坊山門東向南北爲鐘鼓
樓上爲戒壇內正殿後殿又後六方樓三層又後山

巔有樓正殿門外有

聽法松山門內有娑羅樹

聽法松三字
鐫于石闌

寺北爲觀音閣

後爲海棠院院東爲

來青軒有

聖祖御書西爲妙高堂北爲無量殿

湯右曾來青軒敬瞻

御書恭紀丹梯翠磴引躋

攀忽到天開地闢間別有樓臺連碧落盡消烟霧

出青山光涵象外千重影氣結空中五色斑奕烏

華軒懸

御扁墨痕鮮潤似初頒

定城詳畧
來青軒西南爲歡喜園東西各有枋楔寺稍西六方
亭爲

暖霜臯寺西北由盤道上爲洪光寺山門東北向內建
毘盧閣殿正殿左爲太虛室又左爲

香鼎室洪光寺前盤道間敞宇爲

霞標磴宇北爲

玉乳泉泉西稍南爲

絢秋林林北爲

雨香館爲灑蘭書屋其南爲林天石海

考按自勤政殿以迄雨香館爲內垣凡景二十

內垣凡六門曰東南門曰東北門西曰約白門西南
曰如意門西北曰中亭子門北曰進膳門

麗囀樓北度嶺爲

晞陽阿西爲朝陽洞後爲觀音閣晞陽阿北爲

芙蓉坪樓東敞宇爲靜如太古芙蓉坪西南爲

香霧窟後爲竹鑪精舍其北岩間有

御書西山晴雪石幢爲燕山八景之一又北爲潔青履

香霧窟南稍東爲

栖月崖其西宇爲得趣書屋詎崖半里許設石樓門鐫
題曰雲關崖北爲

重翠崦其下爲龍王堂下有泉崦東南爲玉華寺山門
東向內正殿二層西南宇爲

玉華岫其東爲臯塗精舍寺西南峯石屹立上勒

御題爲森玉笏東北爲超然堂堂南爲曠覽臺後爲碧
峯館森玉笏東北峯上有亭爲

隔雲鐘以遙聞大覺生寺華嚴鐘聲也

考按自晞陽阿以迄隔雲鐘爲外垣凡景八

長元按乾隆三十六年

皇太后八旬萬壽 賜三班九老宴遊香山次日 命
畫工艾啟蒙繪圖文職九老顯親王衍璜恒親王
崇志大學士劉統勳協辦大學士官保吏部尙書
託庸戶部尙書素爾訥刑部尙書楊廷璋刑部侍
郎吳紹詩工部侍郎三和武職九老都統四格都
統曹瑞散秩大臣國多歡散秩大臣銜甘都副都
統伊崧阿副都統薩哈岱副都統李生輝副都統
富僧阿副都統色瑞察致仕九老刑部尙書銜錢

陳羣內大臣福祿禮部尙書陳惠華兵部侍郎彭
啟豐禮部侍郎銜鄒一桂副都御史呂熾內閣學
士陸宗楷詹事府詹事陳浩國子監司業銜王世
芳此 國家

崇禎之曠典而亦山靈未有之奇遭佇見

聖化日長宏開壽域際斯 恩遇來遊來歌者正不乏
人矣

宸垣識畧卷十一

宸垣識畧卷十二

仁和吳長元太初氏輯

郊坰

德勝門在京城北之西有

御製詩碑

松林閘在德勝門外城河北閘水自玉泉山發源由高
梁橋東北流至德勝門外分爲二一由水關入內城
是爲御河一出松林閘東流經安定齊化二門歸通
州與白河合閘上勒

御製詩

北城兵馬司副指揮署在德勝門外

龍王廟在松林間明嘉靖間重修

宏慈寺有前後二寺在德勝門外東北

考按宏慈前後二寺相去不半里似一寺而分者
攷寺爲元興國禪林茲于後寺荒草中搜得明肇
迹有元統三年興國禪林之語翰林沈荃作重修
碑記殆本此

長泰寺在宏慈寺北俗名火神廟 本朝初年建

土城關在德勝門外相傳是古薊州遺址亦曰薊邱舊有樓館並廢但門存二土阜旁多林木蒼鬱蒼翠京師八景有薊門烟樹卽此有

御書薊門烟樹四字爲燕京八景之一

出德勝門八里爲土城元之舊也正統十四年十月額森奉上皇車駕登土城以通政司左叅議王復爲通政中書舍人趙榮爲太常少卿出見上皇于土城卽此地也

元時居庸關盧溝橋俱有過街塔按歐陽元功詩薊

門城頭過街塔——行人通寶間則薊邱城門亦有之矣

明姚廣孝薊門詩雲樹依依接遠邛時來飛雨灑
征裘不知銅馬坊何在惟見桑乾水自流

明金幼孜薊門烟樹詩野色蒼蒼接薊門淡烟疎
樹碧氤氲過橋酒幔依稀見附郭人家遠近分翠
雨落花行處有綠陰啼鳥坐來聞玉京盡日多佳
氣縹緲還看映五雲

明吳寬長至出土城詩馬上衝寒出北門豁然平

曠識乾坤地連周圍民猶小天作燕山勢獨尊看
月未忘黃土寺披烟仍見白浮村百官令節長來
此籩豆如流習駿奔

施閨章薊門詩薊門風當雨風定是初晴北關雲
中迴西山馬上明長楊春出獵細柳暮移營儒術
慙疎濶爲郎白髮生

○瑞光寺大勝寺海雲寺俱在土城今無考

明程敏政土城瑞光寺詩日下土城根夷猶古寺
門水聲牆外急人影樹中繁燕薊諸關擁金元一

瘞存故人期不至馬上共誰論

明吳寬大勝寺詩高樹叢生積水清亂蟬齊噪夕
陽明青苔滿地留人迹黃土何年繫寺名便與詩
家謀共隱不從衲子話無生繩牀久坐涼陰下縛
木爲橋喜更平

明程敏政與李賓之遊海雲寺詩偶過都城北來
遊古礪濱微風清細暑小雨浥輕塵忽起殊鄉念
聊閒薄宦身何時重載酒同作看花人

○賢樂堂在德勝門外土城元延祐中賜太保出別

業堂名趙孟頫題後有亭曰燕喜取詩魯侯燕喜也
○大壽元忠國寺元托克托建爲皇太子祝釐在土城
本裕倉豐盈倉在德勝門外

北營外西北守備署在德勝門外大關

臥虎橋卽土城外大石橋

原按今之土城卽元大都城故址元時所稱健德
門乃今之土城關北也

多寶佛塔禪院在德勝門土城外西北里許舊名千佛
寺明萬歷乙酉慈聖宣文明肅皇太后建有吏部尚

書趙志皐碑

北極寺在德勝門土城外

碧霞元君廟在北極寺之東俗稱北頂

功德林在土城西北里許有養濟院勅曰功德林雍正
元年重修

○雙線舖在德勝門北明景泰元年築

原按元至元十八年置雙線局提領副使各一員
當在其地

慈度寺在土城關東北建于 本朝初年俗名黑寺以

其與雙黃寺同爲喇嘛所居此覆以青瓦故名有

聖祖御書額

察罕喇嘛廟在慈度寺北俗呼後黑寺康熙五十二年
聖祖賜無量壽佛二尊供奉大殿

慈救寺在曹八里屯北頂東南距德勝門八里許舊名
五聖庵

西紅廟在德勝門外正黃旂教場北

東紅廟在西紅廟東舊稱團營關帝廟俗稱東紅廟順

治十二年奉

勅重建 賜名忠義殿有

世祖御製碑

考按明景泰間于謙選三大營兵分十營團練號
曰團營英宗復辟廢之成化間復立增爲十二此
廟乃明代團營所祀之神

○鷹房在德勝門外中鄉土城關外水磨村之東今僅
存其地名

明雷思霈詩遼城金壘古鷹房羊角風沙接大荒
野窟舊無狐兔蹟小池今有芰荷香黃鸝獨語遮

深柳粉蝶叢飛戀短牆千古幽州還禹甸卜年開
統憶先皇

安定門在京城之東

方澤壇在安定門外北郊形方象地方折四十九丈四
尺四寸深八尺六寸濶六尺澤中貯水方丘北向二
成上成方六丈下成方十丈六尺均高六尺上成正
中六六方甃外八方均以八八積成縱橫各二十四
路二成倍上成八方八八之數半徑各八路以合六
八陰數皆甃以黃色琉璃每成四出陛各八級皆白

石三成上南左右設五嶽五鎮五

陵山石座鑿山形北左右設四海四瀆石座鑿水形均
東西向水形座下鑿池貯水以祭內壇方二十七丈
二尺高六尺厚二寸壇北三門六柱東西南各一門
二柱柱及楣闕皆白石屏皆朱櫺壇北門外東北鐙
杆一西北瘞坎一燎爐五外壇方四十二丈高八尺
厚二尺四寸門制與內壇同東西門內從壇瘞坎南
北各二壇南門後

皇地祇室五間北向覆黃琉璃圍垣正方周四十四丈

八尺高丈一尺北向設一門外壇西門外 神庫
神廚祭器庫樂器庫各五間井亭二又西爲宰牲亭
亭前井亭左右各一西北爲

齋宮東向正殿七間崇基石闌五出陛左右配殿各七
間內宮門三間左右門各一外宮牆周百有十丈二
尺門三東向門東北鐘樓一內壇周五百四十九丈
四尺北西各三門東南各一門外垣周七百六十五
丈西向門三角門一歲以夏至日祭

方丘舊址爲明嘉靖九年定 本朝因之屢加寬廣

焉

施閨章陪祀 方澤詩雨後仙壇碧草芳遙聞玉
露出芝房崇墉栢帶青霜氣方澤波含明月光
天仗旌旗嚴咫尺精靈嶽瀆走蒼茫朝來回輦
西山見五色晴雲接建章

北營游擊署在安定門外大街

東黃寺在安定門外鑲黃旗教場北順治八年

勅就普靜禪林興建有

聖祖御書及碑記

世宗重修東黃寺碑又

皇上御製詩勒康熙碑陰

西黃寺在東黃寺西雍正元年建有

世宗御書聯額并御製碑又

皇上御製碑

清淨化城廟在西黃寺側乾隆四十八年建有

御製清淨化城塔記清漢蒙古梵字四體書

資福院在雙黃寺西北康熙六十年羣臣祝釐萬壽

聖祖允哲卜尊丹巴瑚土克圖諸蒙古汗王貝子貝勒

公台吉塔布囊請

賜名資福

華藏寺在安定門土城外龍到村

護國天仙廟在土關之北大屯村內磬一鐘一皆明萬
歷年造

真武廟在永安莊何各村明正統間重修碑稱爲太清
觀羽士居之 本朝乾隆戊辰年重修

北路同知署在沙河去安定門四十里

施閨章沙河詩郭外青郊遠 宸遊數往還平蕪

元戰地遺鏃尚田間沙漲寒河水天高接塞山從
來防北口征戍此時間

滿井出安定門外東行五里許井徑五尺餘清泉突出
冬夏不竭好事者鑿石闌以束之水常浮起散漫四
溢井旁蒼藤豐草掩映小亭都人詫爲奇勝

明林堯俞滿井詩寒泉凝碧甃一酌冷人心素綆
無妨短銀牀半欲沈畦渟魚藻入林影鳥巢深偶
值堤邊叟悠然似漢陰

朱彝尊滿井訪崙上人詩郊行方澤外路轉古城

窪小雨乍撥火輕風無聚沙青蓮過橋寺紅杏隔
墻花一笑遠公在催停轂鯨車

考按安定門外東行五里觀音寺之側有高井一
潤百畝四時流溢或卽其地德勝門西北東鷹房
村有稱爲滿井者廣可丈餘圍以甃甃泉味清甘
四時不竭水溢于地流數百步而爲池居人汲飲
賴之蓋郊北之水來自西山固無足異載筆者以
相去不遠方名互訛未可知也

東直門在京城東之北

望京村墩臺在東直門外明景泰間築

望京館在城東北五十里孫侯村遼建爲南北使臣宿息飲餞之所宋王曾上契丹事日出燕京北門至望京館卽此

考按今其地名孫河屯或孫侯村之轉音也爲古北口孔道

春場在東直門外一里順天府尹迎春自場入于府舊有迎春亭今廢有碑存

北營外東北守備署在東直門外大街

定城記略
華光寺在東直門外之北有明天順間重修碑

○靈惠寺在東直門外之南有勅建碑今廢

明金忠潔公鉉墓在東直門外六里今墓碣存

金公鉉甲申三月以兵部主事巡視皇城盡節玉河
時有中官呂胖子同死二公骨不可辨其家人遂同
葬之玉河岸

碧霞元君廟在東直門外俗呼東頂

朝陽門在京城東之南門外築石道東至通州有

御製重修朝陽門石道碑

東城副指揮署在朝陽門外雞市口

中營外東守備署在朝陽門外大街

北營外西一守備署在朝陽門外雞市口頭條衚衕

天妃宮出朝陽門沿河往南明成化時建其地名大橋

北西河沿有大學士丘濬碑

東嶽廟在朝陽門外元延祐中建累朝歲時勅修編廟

戶守之 本朝康熙三十九年重建乾隆二十六年

修葺有

聖祖暨

今上御書扁額并御製碑又御製詩

朝陽門外有東嶽廟其塑像劉鑾手製墀中豐碑三道其一爲張天師神道碑趙文敏孟頫書其一爲仁聖宮碑虞文靖集隸書其一爲昭德殿碑趙世延書大都南城長春宮都提點馮道頤始作東嶽廟于宮之東謀于其徒曰不得劉正奉名元名手無以稱吾祠且正奉嘗從吾徒游將無靳乎卽詣正奉言之正奉以前勅未之許也是時廟未成民間以靈異禍福相恐動事未甚顯灼馮去後正奉果恍惚若有所感者

病不知人者二日或爲之禱乃起謂門人子孫曰速爲我御我且之東嶽廟至廟疾良已曾立廟奏御正奉祝曰願親造仁聖帝像旣而疾大安又進秩二品益喜曰是神之賜也因又造炳靈公司命君像而佐侍諸神有弗當其意悉更之蓋幾有神助者仰瞻仁聖帝巍巍乎帝王之度矣餘皆稱其神之所以名者初正奉欲造侍臣像心計久之未措手也適閱秘書圖畫見魏徵唐像乃矍然曰非若此莫稱爲相臣者遽走廟中爲之卽日成正殿仁聖帝兩侍女兩中侍

四丞相兩介士其西炳靈公兩侍女兩儀臣其東司
命君兩道士兩仙官兩武士兩將軍皆出正奉之手
善觀者知非他工所能雜其間也長春之白雲觀金
人汾王先生十一曜奇妙爲世所稱道今遂配之畧
不可優劣又上都三皇像尤古粹造意得三聖人之
微亦正奉之所造也

查嗣璵詩阿哥尼後孰知名活脫爭傳正奉精昔
日黃冠今紫綬莫將搏換等閒輕

勞宗茂謁東嶽行宮詩絳闕東郊近神功仰大生

祀隆三代典化治萬方平肅肅冠裳侍森森羽衛

榮緬思劉正奉妙手發精誠

像爲元正奉大夫劉元塑

考按劉鑾應作劉元觀學古錄輟耕錄可證其誤
至鑾在元前別是一人詳見皇城天慶宮所引析
津日記條下廟內趙孟頫碑存虞集趙世延二碑
今無考

○昆吾公廟金天德中建

○官窰塲白虎廟元道士吳全節建

○元真觀明正德中太監劉瑾建有大學士李東陽碑

淨住寺在朝陽門外乾隆三十二年修有

御製碑清漢字各一通

○元董字定杏花園在上東門外植杏千株字定張留
孫弟子三十八人之二也虞道園歐陽原功陳衆仲
揭曼碩果羅洛易之皆有題咏

元虞集風入松詞畫堂紅袖倚晴酣華髮不勝簪
幾回晚直金鑾殿東風軟花裏停驂書詔許傳官
燭香羅初剪朝衫御溝冰泮水拖藍飛燕又呢喃
重重簾幙寒猶在憑誰寄金字泥槭爲報先生歸

也杏花春雨江南

元張仲舉摸魚兒詞記蘭臺舊時風景西樓燈火
如畫嚴城月色依然好無復綺羅游冶歡意謝向
客裏相逢還有思陶寫金尊翠傘把錦字新聲紅
牙小拍分付倦司馬繁華夢喚起燕嬌鶯姁肯教
孤負元夜楚芳玉潤吳蘭媚一曲夕陽西下沈醉
罷君試問人生誰是無情者先生歸也但留意江
南杏花春雨和淚在羅帕

楚芳吳蘭
二妓名

長元按詞苑叢談云道園詞題于羅帕柯敬仲購

得之裴黃作軸張仲舉爲賦摸魚子紀其事兩公
之詞皆極溫麗足爲玉堂佳話

○漱芳亭元道士吳全節建初燕地未有梅花閑閑嗣
師從江南移至護以穹廬扁曰漱芳亭時羽士張伯
雨號句曲外史從王溪月真人入京偶造其所若與
西湖故人遇徘徊旣久不覺熟寢其中日暮歸道所
由嗣師命作詩伯雨遂賦長歌有風沙不憚五千里
將身跳入仙人壺之句嗣師大喜送翰苑諸公和之
伯雨由是知名

朝日壇在朝陽門外東嶽廟南數武壇制方西向一成
方五丈高五尺九寸面甃金磚陛四出皆白石各九
級圓壇周七十六丈五寸高八尺一寸厚二尺三寸
壇正西三門東南北各一門凡甲丙戊庚壬年

親祭餘遣官每年春分日祭以卯時壇上金版朱書
大明之神位

勞之辨朝日壇陪祀詩扶桑一出遍寰中壇墀春
風禮向東位首三辰光燭物象尊兩曜晝懸空經
天度數乾坤合掃地規模 丘澤同九獻告終歸

宸垣謝畧
珮緩金烏已射古壇紅

黑松林在朝日壇外古松萬株森沈蔽日都人常游宴
于此

明孫之茂蝶戀花詞落盡棠陰春已暮芳草多情
纔過濛鬆雨柳絮顛狂飛不住秋千正在濃陰處
廟口神弦初罷舞畫扇輕衫隨意城東步笑逐鈿
車歸去路酒香一行青松樹

○月河寺在朝陽關南首舊園之西古名寶藏寺有一
栗軒聚景亭諸蹟今皆圯廢

月河梵院僧道深別院也池亭幽雅甲于都邑道深通儒書明宣德中住西山蒼雪庵賜號圓融顯密宗師後歸老乃營此自娛自號蒼雪山人程敏政爲記

○南北通法寺有勅建碑已廢

隆壽寺在朝陽門外有勅建碑今存其相近有長壽寺亦係勅建已廢

○東郭草堂明興濟伯楊善別業已廢

太平倉萬安西倉儲濟倉在朝陽門外

蔬糧臺在朝陽關外六里舊傳唐太宗東征高麗屯兵

虛設困倉以誘敵人俗因呼其地曰荒糧臺

慈雲寺在朝陽門外八里莊乾隆三十三年

勅建有 御書石扁

東路同知署在通州去朝陽門四十里

東便門在外城之東北隅

裕豐倉萬安東倉在東便門外

大通橋在東便門外東至通州入白河開渠置閘而漕
舟不行自大通橋起至通州石壩計四十里地勢高
下四丈中間設慶豐等五閘以蓄水每閘各設官吏

編夫一百八十名造剝船三百隻大通河舊名通惠
河元郭守敬所鑿俗亦名裏漕河 本朝康熙乾隆
間屢加疏濬漕艘之分運京倉者實利賴焉有

御製閱五閘詩碑

通惠河源自昌平縣白浮村引神山泉西折南轉過
雙塔榆河一畝泉玉泉諸水至西門入都城南匯爲
積水潭東南出文明門東至通州高麗庄入白河總
長一百六十四里一百四步元世祖至元三十年告
成賜名曰通惠

白浮泉今入清河一畝泉在甕山後已塞甕山下玉
龍青龍等泉入西湖經高梁橋注皇城濠一自南流
入內一自東會入通惠四里至慶豐慶豐十一里至
平津慶豐地形高平津一丈許水陡絕故平津開則
慶豐河身立見矣

明徐階夏日游通惠河詩頗憶三江遠乘流意若
何水深秋氣入樹密雨聲多熟果當尊落驚禽拂
棹過柳陰催繫纜歌枕聽漁歌

勞宗茂游二閘詩紅船白板綠烟絲好句揚州杜

牧之何事大通橋上望風光一樣動情思
慶豐纔過又平津立遏通渠轉遞頻莫謂盈盈衣帶水
勝他多少犢輪辛

○雙清亭在通惠河上元都水監張經歷園也今廢
元宋褰春暮雙清亭小酌懷張孟功詩吏退公庭
雁驚行持杯暫對水雲鄉山開罨畫涵清影花落
胭脂漾晚香酒幟隔津標柳陌漁舟避浪向蒲塘
懷人不得同相賞空賦停雲第二章

大通橋公署在通惠河北岸門東有明夏言詩勒石

藍靛廠金章宗鹿園遺蹟在大通橋東

大通橋東有鹿園方廣十餘里地平如掌古樹偃仰
與高冢相錯傳是金章宗時故址

三忠祠在大通橋東里許地名槐村義士周珍創建祀
漢諸葛武侯宋岳武穆王文信公祠後有濯纓亭卽
河之畔

明何景明三忠祠詩三忠祠在帝城東檜栢陰陰
沙院風朝暮衣冠頻下馬春秋香火一開宮中原
涕淚江山遠異代精靈廟宇同漢業崩摧如宋業

古今南北恨無窮

○匏瓜亭元趙參謀別墅趙名禹卿有王鶚記王磐敘
劉因詩去城東十里又曰東臯村當時日日趙匏瓜
今莫詳其址

元王惲匏瓜亭詩築臺連野色架木繫匏瓜舍外
開三徑壺中自一家愛吟歌白苧醺酒脫烏紗更
喜南窗下秋風菊半華

長元按舊聞載匏瓜亭于右安門之南因帝京景
物畧于草橋下有趙參謀之匏瓜亭在彌望間蓋

循元志之舊考謂去城東十里移于東便門外本
王秋澗詩陽春門外望東臯也

廣渠門在外城之東

中營外東南守備署在廣渠門外關廂大街

尤侗過都城詩沙河門外草蕭蕭落日西山影寂
寥空繞紫城尋陌路祇看白塔起雲霄天邊大老
施行馬月下孤兒出射鵰三過長安綠底事使車
不爲午門朝

神木廠在廣渠門外二里許明永樂時神木尚存有

御製神木謠勒石

北京神木廠大木俱刻字爲記其上有王二姊張點
頭嫌河窄混江龍之名皮爛心存對面猶不見

延壽寺在馬坊去廣渠門十八里有浮圖一明嘉靖中
建有禮部侍郎許成名戶部郎中李景二碑

圓覺寺在武基去廣渠門二十里明正統中司禮監金
溶建初名報恩賜額圓覺有正統嘉靖間碑三

○蒯徹墓在廣渠門外八里莊古阜高可四尺墓前有
井

原按于欽齊乘蒯徹墓在臨淄東二里漢書徹范陽人高祖曰徹齊辯士故卒葬此未知孰是

左安門在外城之東南

宏善寺在左安門外迤東魏村社明正德中太監韋霖建俗呼韋公莊園亭已圯海棠蘋婆柰子俱無存惟假山深溪在耳寺後有靜樂軒尚修潔西壁有康熙初禹之鼎畫雙鶴圖東壁有陳奕禧書徐渭畫鶴賦時稱二妙

韋公莊有柰子古樹婆娑數畝春時花開望之如雪

三夏葉特繁茂列坐其下烈日不到袁公安嘗謂戒
壇老松顯靈宮栢韋莊柰子可稱卉木中三絕

韋氏別業四圍多水荻花蘆葉寒雁秋風令人作江
鄉之想寺南觀音閣蘋婆一株高五六丈寺內西府
海棠二株高二尋每開時爛如堆綉香氣滿亭昔人
恨海棠無香誤也

明王世貞集韋氏水亭詩偶成春服始挾侶問幽
蹤芳草近寒食空林聞午鐘驚波雙鳥出迷路一
僧逢欲竟名園賞停杯感慨重

王士禎宏善寺看海棠詩韋杜城南十萬家東風
處處酒旗斜不知冷節匆匆過猶見僧樓一樹花
木魚聲靜佛香遲日午風簾自在垂好是維摩
方丈室恰逢天女散花時

宋肇過韋公寺詩竟阻尋幽興空攜作賦才開樽
思兔苑杖策過香臺畫棟秋雲隔松關暮雨催南
征聞奏捷飛蓋會追陪

是日游安親王園不得進而返

查嗣璫雜咏詩一株柰子數畝雪六丈蘋婆萬朶
霞少借山僧甕中酒來看宮監寺前花

○金井在魏村社明永樂嘗駐蹕于此飲而甘之遂命
甃焉今無考

隆禧寺在左安門外迤西東臯村明弘治十三年太監
李興建賜額隆禧有弘治萬歷間碑二

永定門在外城正南

南城副指揮署在永定門外

中營正南守備署在永定門外

燕墩在永定門外半里許官道西恭立

御碑臺勒

御製帝都篇皇都篇均清漢書臺高二丈許繚以周垣
碑立正中形方而長北面下刻諸神像頂刻龍紋

金臺在永定門外東南三里許巋然土阜有亭勒

御書金臺夕照四字爲燕京八景之一

金臺有三在易水東南者曰大金臺在大興縣東南
者曰西金臺又曰小金臺卽燕昭王師事郭隗置千
金于上以延天下士者金人慕其名亦築此臺在舊
城內游者往往極目于斜陽之中徘徊留憩

原按隋上谷圖經黃金臺在易水東南十八里酈

道元注水經言昭王禮賓廣延方士不欲令諸侯之客伺隙燕邦故修建下都館之南垂則金臺在易州明矣京師故蹟傳是後人所築然自六朝至今垂之載記形之歌咏所當並存不廢夫燕之臺匪一京城之金臺安知非寧臺展臺之舊耶

長元按元納新南城咏古詩注金臺在大悲閣東南隗臺坊內其地約今白紙坊殆金所築也

明林環金臺夕照詩高臺曾此置黃金人去臺空碧草深落日未窮千里望青山遙映半城陰雁將

秋色來平野鴉帶寒光過遠林
昭代賢才登用盡
不須懷古動長吟

曹仁虎黃金臺詩
穹臺百尺薊邱邊
北面猶思事
隗年未必懸金能致客
只緣擁篲善尊賢
甘棠世
胄遙分召析木封疆竟霸燕
莫向通霞同弔古通霞
臺亦燕昭王築
從來求士勝求仙

○元郊臺在麗正門東南七里其地約今永定門外
明駙馬都尉鞏永固墓在永定門外

海會寺在馬家村明嘉靖間建
本朝順治間重修

隆二十二年復加繕葺正殿有范銅佛像有

御書額并御製詩碑

孫廷銓丙申長至 駕在南苑被命齋宿大紅門
張幕海會寺和李坦園學士詩御宿迢遙接泰壇
微微鐘漏夜將闌雙林月上金輪靜七校風清玉
幢寒宣室夜談梁太傅桂宮晨敞漢祠官由來郢
曲高難和徒傍卿雲借日看

凉水河其源出右安門外西南鳳泉東流經萬泉寺分
爲二支一南經草橋一北經廣恩寺俱東注永勝橋

合爲一東南流至小紅門之西入南苑滙一畝泉
及三海子諸水由五空橋出經馬駒橋東流至張家
灣入潞河乾隆三十八年共修河道八千餘丈詳見
疏濬事宜有

御製涼水河詩勒石大紅門外永勝橋東

碧霞元君廟在南苑大紅門外土人呼爲南頂

九龍山在南頂永勝橋北岸乾隆間疏濬涼水河之土
堆成自西至東約長三里高二三丈不等委蛇起伏
宛如游龍環植桃柳萬株開廟時游人挈榼敷席羣

飲夏木陰陰水田漠漠不減江鄉風景也

吳巖游南頂詩柳映紅亭水映橋碧霞宮殿鬱宮
堯年年五月開香社大好風光慰寂寥 龍岡委
宛似卷阿披拂薰風爽氣多一帶葦棚臨水岸酒
徒豪飲妓童歌

○永平館一名碣石館遼時朝士宴集之所明一統志
云在府南一十里約今永定門外

南苑在永定門外二十里元爲飛放泊

詳苑圃

元靈宮在南苑小紅門內西偏順治十四年建內有朝

元門構元極殿奉

玉皇上帝內爲凝思殿奉三清四皇像東曰翊真殿奉
九天眞女梓潼像西曰祇元殿奉三官像官門後圍
房一十六楹中三間爲靜室有

御製詩碑

永慕寺在小紅門西南康熙三十年建大殿五間東西
配殿各三間後爲經庫爲

孝莊祝釐之所

德壽寺在永慕寺東順治十五年建後燬于火乾隆二

十年重修門殿二層後爲御座房有

御製重修德壽寺碑

關帝廟在德壽寺西南里許建自前明本朝乾隆三年重修殿三層

永祐廟在德壽寺東南二里許康熙十七年建門殿三層中奉天仙碧霞元君爲

孝康祝釐之所

晾鷹臺在南海子內中有殿殿傍晾鷹臺臨三海子築七十二橋以渡元之仁虞院也明天順三年修南海

子大紅橋一小橋七十五

元時冬春之交天子親幸近郊縱鷹隼搏擊以爲遊
豫之度謂之飛放至順二年築柳林海子堤堰

查慎行詩紅門草長少飛埃萬頃平疇掌上開一
道修眉濃似畫近南遙識掠鷹臺

魏之琇詩掠鷹臺迴接漚汀民樂成歌囿沼靈七
十二橋虹影度騎郎爭放海東青

海子西北隅清明日蟻集成邱中一邱高丈旁三四
邱亦數尺竟日乃散土人呼爲螞蟻墳西墻有沙岡

委蛇歲歲增長高且三四丈土人曰沙龍

長元按螞蟻墳宛平志云相傳遼將伐金全軍沒此魂無主者化爲沙蟲感時序而動理或有焉竊以此語傳會詩東山篇鶴鳴于垤山東蟻塚有極高大者如塚墓然孟子所謂丘垤丘是自然高處垤乃蟻塚上土共盤馬于蟻封卽此是也以是知南苑蟻墳亦蟻垤之類惟清明日蟻集其上爲可異耳若純蟻疊成次日散去仍爲平地卽聚萬億之蟻不能纍纍若是理未可信以俟見者訪之

寧佑廟在晾鷹臺北六里許雍正八年建大殿奉南苑
安禱司土神像有

御書額并御製海子行詩

龍王廟在黃村門內 行宮之東額曰珠源寺半山房
五楹曰拂雲岫西河房五楹曰月漪皆

御書

海子內泉源所聚曰一畝泉曰團河而瀦水則有五海
子考一畝泉在新衙門之北曲折東南流經舊衙門
南至二閘凉水河自海子外西北來入苑漚之其水

發源右安門外之水頭莊東流折而入海子北牆至
張家灣入運團河在黃村門內導而東南流逕晾鷹
臺南過南紅門五海子之水自北注之又東流出海
子東南是爲鳳河東流歷東安武清境至天津之雙
口與永定河會渾水藉此蕩漾乃成清流又東至韓
家樹入大清河又東至西沽入運雖五海子之水與
凉水河團河時相灌輸而二河正流仍各判別若玉
泉則由昆明湖達于長河穿禁城出東南流爲通惠
河至通州入運並不經行海子與一畝泉團河渺不

相涉綜而論之通惠河源在北入運最近凉水河源居中入運次近鳳河源在南入運最遠源委秩然不紊前代著述家未加稽考率以玉泉牽附海子支離可笑因詳訂之

團河一支醴爲鳳河其形如鳳源在南苑中流出東南隅至武清之緱上村河身深廣以下填淤斷續一遇伏秋雨潦散漫無歸雍正四年 命修水利查有凉水河發源水頭莊貫南苑出宏仁橋東流至高各莊東北流抵張家灣入運乃于高各莊分流南引至

緱上村入鳳河故道一路挑挖過雙口抵清沽港入
淀河仍于分流之處各建一閘水小則開東閘啟南
閘流入鳳河水大則閉南閘啟東閘洩入運河次年
河成宛平瀋縣武清東安一帶積潦盡消桐林牛鎮
三間房等處開渠引水各營田數十頃

長元按以上二條從

御製詩注錄出源委分疏明晰條暢足訂歷來著述家
之謬

采育古安次縣采魏里也去都七十里明初爲上林改

名蕃育署統于上林苑不隸京府乃元時沙漠地永樂二年移山東西民填之有恒產無恒賦但以三畜爲賦計營五十八舊有鵝鴨城

采育東南二十里有阜高一丈廣三四十尺曰聚燕臺歲秋社燕辭巢日必各將雛數千百聚此臺呢喃一二日然後分飛而去今無考

南路同知署在黃村

宸垣識畧卷十二